

Marisikalo san 2017

San 45nan - Boko 542nan

Songo = Dōrōmē 35

Kibaru

Kunnafoniseben bota kalo o kalo. - BP : 24 - Téléphone : 20.21.21.04 Kibaru bugufiyé Bosola Bamako

Mali ntolatanko
cunna a kun kan

Le 8

Jamana sigikafoba fan be dakejena

Sigikafoba min kera Mali ni koronyanfan mogor murutilenwan'an demebagaw ce Alize Alizeri faaba la, o benkanseben bolonjabilala mekalo tile 15'ka to laban Bamako zuwenkalo tile 20 san 2015. O benkanseben in kono, a tun nininnen don sigikafoba were ka ke jamanadenw yeredama ni nōgon ce walasa k'u ce geleyaw fo k'u ban.

O siratige la, sigikafoba in lajini tun ye ka se ka benkan ta ben ni lafiya soroani jamana kelenya sabatili la. Hakilila numan fen o fen mana soro laje in kono, o be ke benkanseben ye. A be jamanadenw hakililaw, u bugunnatigew, utariki

Jamana sigikafoba kōtājekulu nōmogo Baba Hakibou Hayidara file ka səyəsətən dan jmarukuj Ibrahīmu Bubakari Keyita bolo



ani fōnogonko min donna u ce ka fu siri o dan na, min b'a to jamana kelenya ka se ka sabati.

Sigikafoba in daminen marisikalo tile 27, k'a foori awirilikalo tile 2 san 2017. Jekulo kerenkeren saba sigira. Kelen ye baara ke lafiya soro cogoo kan; kelen ye baara ke jamana kelenya sabaticogo kan, kelen do ye baara ke fokaben cogoya kan. Nka fen min ye benkansebenbo labenni ye ben ni lafiya, jamana kelenya ani fokaben sabatili kan, o ma se ka ke nin sigikafoba in senfe tuguni. Ale bilala waati were la.

Sigikafoba mindaminena Malidenw ce kabini marisikalo tile 27 Amadu Hanpate Ba togolajenajekeyoro la Bamako, a kuncera awirilikalo tile 2 san 2017. Laje in kunceli nōmogo tun be jamanakuntigi Ibrahīmu Bubakari Keyita bolo. Minisirin nōmogo Modibo Keyita, jamana fangabulonw nōmogow, minisiri tow fokabennaw ka bo jamana kono an'a kokan, lasigiden minnu be Mali kono, ka fara fanga sinamatonw nōmogow ni mogocaman caman werew kan, ninnu bee tun be lajeba in kene kan.

Kuma minnu kera kene in kan, o kumalasela tun ye Nuhun Sangare ye. Akelen ko kalaje in seereyaseben kalan, a kolosira ko gelaya min be

jamana kono bi, a sababuwa ka ca. Mara kecogo jugu y'a fanba ye.

N'o ye forobafen yuruguyuruguli, faso nafolo burujali, dungomogow tali ka bila joyorow la kasoro o dōnniya t'u la, forobabaaraketaw dili sagolamogowma, kiriwtigecogo jugu. A kolosira fana, ko maramafentigijekuluw tundagalene jamana koronyanfan fe, nka fanga ma se ka fu siri o waleya in dan na, marifafeere ni dōrōgufeere ye sangaa soro, sigidaw tun be ka to ka fara nōgon kan ka ke jekulubaw ye. Hadamadenya ni nafoloko tun b'a la

A to be le 2n+an na

Marisikalo tile 8 ye musow ka netaabaara bolodalenw dantigelikene ye

Musow togoladon lajenamayali hukumu kono, Muso ni den ani denbaya ka netaa minisiri Madamu Sangare Umu Ba ye dantigeli ke musow kunkan, u ka penamaya kecogo, yelema minnu be ka don o la politikunda ani mara kecogo siratige la.

San 2015, sariya do tara min b'a to musow sen ka don joyoroni ni na kosebe jamana kono. O de kosoñ, konseyesigikalata minnu kera san 2016 nowanburukalo tile 20, jaabi jorjorw soro la ou la musokunda. A sariya talen ni bicekura farala musow ka wulikajo kan politikola. Misalila, depitesigikalata la san 2013 yere la, sannia sariya inta, muso 152 tun be depleteya nōfe; nka 14 sera ka wasa soro a ko la. O b'a jira ko muso hake min tun y'a kanbo, kemesarada la 9,52 sabatira o la. Fen min ye san 2016 konseyesigikalataw ye, muso



Muso ni den ani denbaya ka netaa minisiri Madamu Sangare Umu Ba

26.080 tun be konseyeya nōfe; kasoro san 2009 na muso hake min tun b'a nōfe, o tun te teme 1.537 kan. Kemesarada la, 25,6 farala san 2016

ta jinibaa hake kan. An be don min na, musow ka wulikajo joyoroni ni na, o te jama laboli dōron ye bilen ka di joyoroni ni na kosebe.

Muso ni den ani denbaya minisiri

ye netaabaara cāmanboloda ka nesin marayorow ma; kerenkeren na jamana koronyanfan an'a cemance la. Odo ye hadamadenya sabatili ani soro netaabaaraw ye ka nesin musow ma, basigbaliya ye dankari minnu na kosebe. Baarakeminendō dira muso dōw ma Moti, Gawo ani Tumutu. Muso ka netaa sabatilicakeda minnu b'o marayorow ni na faabaw kono, minen kuraw dira oluma. Muso minnu y'usigiyorow bila ka yelema fan werew fe, kalanw bolodara ka nesin olu ma ani lafaamuyaliw fokaben siratige la.

Minisirisolabanna ka jateminek'e, muso hake aniduhake miny'a siyigoro bila ka yelema fan werew fe, k'olu hake don, an'u be dabolo min kan Burukina ni Nizeri jamanaw kan, k'o fana don, k'a mogor hake don.

Muso minnu koseginna Tumutu ni Gawo ni denbatigw don., minisiri

A to be le 3n+an na

KONKO BE LE 8NAN NA

N° 2

ka nagasi ka taa a fe. Mogow hine te jogon na, wa benkan fen o fen bolonibila ka teme, a site ka matarafa.

Fen min ye Azawadiko ye, Nuhun ka dantigeliw y'a jira, ko Azawadi te yoro ye jamana kono, politiki do ka kan ka laben ka nesin min maracogo ma. Jamana korofela bee fana te se ka wele Azawadi la.

Hadamadenya ani seko ni dongo siratige la, Azawadi be fo; nka politiki ni sariya nasira la, a maracogo te se ka laben k'a ke a damanayoro ye jamana kono. Nuhun ka laseli la halibi yelema numan ka kan ka don mara

kecogo la. Nafolo fen o fen dira korofela yiriwali siratige la, n'o ye yiriwaliporoze minnulabenna a kama, olu dondaw ka segesge. Goferenaman togolabaarakelaw n'a baaradaw ka segin korofela la, ka sigidalamogow lafaamuya u k'a don k'u yere ka kan ka jogon mince ania ka dannaya, du u kan fognognokw kubenni na, ka maramafew bilali waleyaw sennatiya jekulu kono. Lakanabaajekulukura min sigira sen kan, o ka se ka jamana korofela bee lasoro a ka baaraw la.

Lajini werew ye jamana koronyanfan n'a tilebinyanfan mogow ka donnognona ye seko ni dongo

waleyaw la, ka baganmara sariya do laben, ka laadalafangaw sinsinani ka don kelen kereneren jamana fan bee fe, k'o ke ben ni lafiya don ye.

Jamanakuntigi Ibarahimu Bubakari Keyita ka laseli la, a ye foli ni tanuni nesin lajekela bee ma, ka da a kan dogon kelen in kuntaala kono, u sera k'u hakillaw jira jamana geleyaw furakecogo la. Ko jugu minnu be jamana kono, da sera olu caman ma. Kerenerennenya la mara kecogo jugu. A ninina yelema numan ka don mara kecogo la jamana kono. Fanga ka kan ka jamanaden bee mince kelen ye; fisamanciya kana k'a la.

Jamanakuntigi y'a jira ko fen minye

ben ni lafiya benkansében ye, o min bera laben, a kono bera jenseñ jamana kono, an'a kokan. Jamanakuntigi ko fosi ma fo kene in kan min temena a kan. O siratige la, a bera jekulu kerenerennen sigi senkanteliya la kofila n'enabolikama. A folo ye sigikafo do ye jamana cemance kopew kan, a filan ye Azawadiko ye. Ben ma se ka ke o min kan Bamako sigikafo sente.

Ben ni lafiya soroli la halibi, a ninina goferenaman fe, a ka sigikafo ke ni Amadu Kufa ni lyadi Agi Ali ye; nka k'a jey a ma, ko jamana te mara ni diine kelen taabolo ye.

Masa Sidibe / Dokala Yusufu Jara

Fasokanw togoladonba seli kera Zancebugu ninan

Zancebugu komini be Bugunin kafo fe. Fasokanw togoladonba seli kera o komini in kono ninan, alamisadon, marisikalo tile 14, san 2017, k'a kuncé Bamako o dugusaje ni barosigi ye, jumadon, kalo tile 15, AMALAN lajekesoba kono.

San o san, seliba fila minnu be ke kanko la dije kono, olu be sementiya an ka jamana kono : setanburukalo tile 8 ye balikukan donba ye. Februyekalo tile 21 ye fasokanw togoladonba ye.

Dije kono, masalakun min sugandira seli in hukumukono, o kera nin ye : «Siniñegi sinsinnenko numan be latige ni kancamannakan sabatiliye.» Malikono, min sugandira ka kene dije masalakun sugandilen ma, o kera nin ye : «Duguka yereyiriwa sabatilan ye kancamannakan ye.»

Mali kankou penini cakeda, n'o ye AMALAN ye, fasokanw togoladonba seli labenni kalifalen b'ale de la san o san.. San 2017 n'enajew ma se ka laben ka ben ni februyekalo tile 21

ma, ka da geleya caman kan, i n'a fo waati koronni, nafoloko, ani baarada yere lataamagoc geleyaw.

Zancebugu komini n'a dugu 40 bora kosebe ka seli in ke ni wasa ye. A faamalamogo si ma to ko, ka fara dugutigini a k'korosigiwkan. Lakoliko nemogow, lakolikaramogow n'u ka kalandenw, olu si ma to ko baaraw sabatili la.

Sanni Bamakokaw ka na, Zancebugukaw ye kene nama fifa n'u ka laadalajenajew ye, i n'a fo didadi, napolon ani donsotoliw.

Jama dafalen, u taara u ne da musow ka yereyiriwaso kan, ka musow ka cissi seereya. Dugutigi, mere, kalanko nemogo, olu ye kuma ta ka jama bisimila. Uye nabagaw fo. Obolen koyen, ben ni kelenya minbe Zancebugu n'a komini dugu 40 kono ani kalanko be dabolo min kan Bugunin Akademi lakolisol la, u ka kumaw bolila olu kan.

AMALAN nemogoba ye kuma ta o kofe, ka komini fo, a dugutigw n'a

faamaw, a musow, ani jamana nemogow n'an demebagaw, kasoro k'a da don a ca cakeda ka baarabakelen na kanko la.

Danegefaw dilannidonnijabolo fara caman na fasokan 12 la, ani kan 12 ninnu maben (sariyasun misaligafe labenni, a da sera o fana ma. O kan 12 ye : bamanankan, boore (bobo), fulfulbe, ddogoso, mamara, maninkakan, soninke, sonyoy, smaarena, tamásáyset, tyeyaxo (bozokan), xaasongaxango (kasonkakan).

O kofe, fasokan 13 minnu lakodonnen be sariya fe, kalandenw temena n'olu misaliw ye jama lekoro. Fondason Karanba Ture tugura o la, ka waleyaw jira n'a kabaarakeminew ye minnu y'a jira ko donnia suguya bee se be ka lase an k'u soro ni fasokanwye, sangosiyansi donniyaw.

Baaraw kuncera ni Sanfekalan ni Donniyanini Minisiri ka laseli ye. Ale yere ma se ka ye kene kan. An balimamuso Madamu Tarawele

Fatimata Diko min y'a nonabila, o da sera fasokanw togoladonba seli nafa ma dije kono an'ka jamana kono, k'a ka kumaw kunce ni foli ni tanuni ye ka nesin jamana nemogow ma, an demebagaw feere ni nafoloko la, ani fasokanw yiriwali cakedaw n'a baara k'ebaga bee.

Jumadon, barosigi kumatigi tun ye an karamogo Musa Jaabi ye. Ale ye fasokanw lafasabaga n'a yiriwabaga jonjon ye kabini tuma jan. Ale ka kumaw bolila kancamannakan ni kancamano joyoro kan ben sabatili la an ka jamana kono ani dije kono. Kabini lawale fo bi, fasokanw be ka hadamadenw, jekulu, duguw ani jamanaw kala jogon na. Halibi a be se k'o joyoro kelen in ba ben sabatili la k'orom fe. Karamogobaw ni jama faamuyalen minnu tun be barosigi in kene kan, olu y'a jira ko ni sigikafow ni lajew tun be ke fasokanw na, sisan tun'ba soro jogonfaamuya nana, lafiya ani ben sabatira jamana koronyanfan na.

Mahamadu Konta

Baraziko ni nakoko cakeda

«IPORO.EREYAZIRI» ye mogo 152 ke kalanden jolenw ye

Sene yiriwali siratige la, cakeda in be wele tubabukan dañé surun na Iporo - Ereyaziri (IPRO - REAGIR).

A be baara ke Kulukoro ni Moti maraw kono Mali seneko minisirisoka yamaruya kono. Iporo Ereyaziri dagayorzye Welesebugu ye. Walasa ka do fara seneksekuluw fanga kan, Iporo-Ereyaziri b'a la ka barazi jo dugu d'ow la ka kojenabojekulu sigi o duguw kono barazi ninnuladonni an'u labaarako numan kama. O barazi do be Digato Sanankoro ba komini na, do be Jorila Jalakoro ba komini na, do be Sikoro-Jitumun, Kolena, Zelabuguani Banankoro-Jitumun. O dugu 4 be Welesebugu komini na. Do farali o jekulu ninnu ka donniyaw kanokalanw keli donna demedonjekulu Misyon-

Saheli(MISSION-SAHEL) bolo kalo 4 kuntaala kono, k'a damine nowanburukalo tile 10 na ka se marisikalo tile 10 ma. O jekulu in nemogoye Cekura Jara ye. Kalan fila kera balikukan na walasa mogow ka sebaarakesebenw minecogo an'u lafacogo la. Kalo fila laban kera jekuluw mogow kalanni ye u joyorow an'u ka ketaw d'oni na, ka fara nakosene nemogni ani barazi ladoncogon'alabaarako numan kama.

O siratige la, kalanso fila dayelela dugu kelenkelenna kono. Kelen kalandenw tun ye kalanden k'orow ye. Filanen tun ye mogo kuraw ye. Dugu 6 ninnu na, mogo 264 togo s'ebenna, muso hake tun y'o la 116 ye. Mog 208 ye kalan matarafa a

nema ka se kiimeni ma. Olu la mogo 152 kera kalanden jolenw ye; muso hake y'o la 52 ye. Kojenabolikuluw mogow doron ma kalan in ke. Kalanka di mogo o mogo ye duguw kono, o caman y'a togo s'eben ka fara u kan.

Nin kalan min kera, a lajini kerenerennen tun ye, ka se ka caman bo kojenabolikuluw mogow kalanbalii hake la; u ka se k'u ka baara ketaw boloda; ka se mogomara ani warimara kecogo numan na ni maralikeminew labaaraliye; u ka se k'u ka barazi labon ka ne, min b'a to yelema numan ka se ka don u ka soro ni nemamaya kecogo la. Sabula a tun kolosira, ko dugu caman na, tonw kope be peresidan kelen bolo. N'o te faamuyali te a to si la ton labaarali sira

fe. Biromogo bee te jogon d'om, sanko ka jogon joyoro n'a ka ketaw d'om, kuma te ka ton kunnafoni jelen fo mogo were ye.

Barazi suguya fila kolosira duguw la. Sikoro-Jitumun ni Digato, olu taw yepon-baraziwye. Mabilin ni wotorow animotigiyi n'i sennamogow be teme nogoya la o pon-baraziw fe. A to 4 ye baraziw doron ye.

Nakosene ka ji kosebe. A be do fara a kebaaw ka soro kan wariko la ani ka dumuniko nogoya. Nka nako be nafa ne a nedonbaa de ye. A te ne n'i ma nako dayoro d'om. Nogodon ni furakeli b'o cogo la. Nakosene te se ka sabati fana ni nakosi numan t'i bolo. Kalanw bolila nin bee faamuyali kan.

Dokala Yusufu Jara

Le fola to

ye sefawari miliyon 5 di o muso 100 ma walasa u ka se ka nafasorobaaraw dow sigi senkan u yere ye. Walasa musow ka nafasorobaaraw kek'a jini ka se uyere koro, kerenkerennenya la wulakonomusow, fanntanya keleli poroze do sigira senkan olu ye. O ye mansinw dili ye u ma, a be fo minnu ma tubabukan na «pilati militifonkisonneli». O poroze in kuntaala ye san 4 ye k'a damine san 2016 la ka se san 2018 ma. Sefawari

miliyari 62 dantigera a waleyali kama ka jesin dugu 5000 ma Mali kono. San 2014 ka se 2015 ma, mansin 62 turula. A to bolodalen don ni (Pinidi/PNUD) ka deme ye. Dije tonba Oni (ONU) bolofara min jesinnen be yiriwali ma, o tubabukan daje surun de ye Pinidi (PNUD) ye. Jamanakuntiganiya ye dugu 5000 in ka se ka silimansin neci caman soro u yere koro, no' ye pilatiformu ye, walima pilati militifonkisonneli.

Musow togloso minnu jora u ka jetaa sabatili ani u ka senyerekoro

kama, olu jesinnen b'u ka hadamadenya sabatiliwalewjenaboli kama. O so minnu tijena, olu lakuruyali baaraw be senna, ani ka kuraw jo. O de koson, San kafo ta joli tufadene folo dara ani ka Tominan ta jolen kura dayelela jamanakuntigi Ibarahim Bubakari Keyita fe san 2015 nowanburukalo la. Bila ni Sinzana-Gare taw lakurayara san 2015 kono.

Poroze were sigira senkan ka jesin musojekulu demeni ma situlubo la. Minha to uka se ka situlu numan soro

ka do fara u ka soro kan. K'a damine sikolo tomori na, k'a bayelema ka ke situlu ye, k'o feere jagokelaw ma, fo ka se sankadunnaw ma, bee ka nafa soro si la. O siratige la, muso 1.200 kalanna situlu numan soro cogeo la, ani situlu lamaracogo numan na wulakonomoduguwla. Afiriki yiriwalibanki min be wele tubabukan na Badi (BAD), o ye sefawari miliyari 2 ani miliyari 700 di deme ye o poroze in waleyali kama.

**Moriba Kulubali
Dokala Yusufu Jara**

Musow ka senyerekoro hadamadenya, nafoloko ani politikiko la

Demedonjekulu filia, n'u tubabukan dane surun ye Sizesi (Six «S») ani Garapesi (GRAPES) ye, olu jera ka poroze do laben ka jesin musow ma Kati serekili komini 5 kono: Baginkan, Muntugula, Jalakoroba, Lagadina ani Kuruba. A poroze tun sinsinnen be do farali ma musow ka donniyaw kan hadamadenya, nafolokoani politikiko la, min b'a to uka se k'u joyoro fa u ka kominiw maraliko la.

Baara folo kuntaala benna kalo 18 ma k'a damine san 2013 okutburukalo la. Dugu 40 sugandira komini 5 ninnumumé kono (Baginkan dugu 12, Muntugula dugu 8, Jalakoroba dugu 12, Lagadina dugu 3, Kuruba dugu 5) n'u konseyew ka deme ye. Dugu kelenna na, musotonba sigira k'o nemogow kalan u joyorow an'u ka ketaw la. Kalan wcrew bolodara ka jesin ton ninnu ma hadamaden ka hawek an'a ka ketaw donni na komini kono. A wulikajow kera konseyesikalataw jekoro. Muso minnu ye faamuyaliba soro kunnafondiwi la ifafaamuyalib sababu la, o caman y'a jini ka konseyeya jini uka sigidawla. Hali ni kalataw bora u dogokoro sine caman

na, politikitonw nemogow koni ye dannaya da muso caman kan k'u fara u kan.

Kunnafoni na, nin waatiw y'a soro komini duuru ninnu mumé muso konseye hake tun ye 7 ye. Baginda kelen, Muntugula fu, Jalakoroba saba, Lagadina filia, Kuruba kelen.

Jama jini kapraji kecogo, jamanakuma kecogo ani musow lasuli ka dusu don u kono u ka farinya politiki keli la, nafa soro o kalanw na kosebe.

Poroze baara kun filanan benna kalo 6 ma k'a damine san 2016 setanburukalo la. Konseyesikalataw kera o kono na. Muso 134 tun y'u ka jebu konseyeyea nofe. Jamana ye sariya min ta k'a jira ko joyoroniwina kemesarada la, 30 ka ke muso ye a dogoyalenba joyoroniwesebenwkan, o fisayar kosebe. Muso 17 ye konseyeyea soro musow cela, minnu tun be joyoro numan na u ka politikitonw ka joyoroniwesebenwkan. Bagindakan 4, Muntugula 3, Jalakoroba 4, Lagadina 3, Kuruba 3.

Komini kelenkelenna musotonba bolo donna jogon boloka jekulukelen

sigi komini togo la. O welela koredinason. O jekuluba 5 fana bolo donna jogon bolo ka jekulu kelen sigi u komini 5 togo la. O welela erezo.

O jekuluba laban in n'o ye erezo ye, omogowkalanna uka ketawla komini kono muso tow togo la. Komini ka san duuru baara bolodalen n'o be wele tubabukan daje surun na Pedeseki (PDSEC), o min jesinnen be hadamadenya, soroani seko ni donko sabatili ma, o labengcogo kalanw kera ka fara komini ka nafolosorsiraw kan, nafolo in lamaracogo an'a laba racogo. Kalan daw fana kera erezo mogow kun jamanemogoya kecogo kan ani musow ni musomanninw haminankowjenaboli musakaw be se ka don Pedeseki kono cogo min na.

Kabini poroze daminewaati la, sefawari miliyari 10 bilala musotonba bolo kan u ka bolomayelembaaraw kamá. Halibi o tonow be ka labaara dugu kono; sabula tonbaara kecogo numan kalanw fana kera u kun.

Desantaralizasonko dabarakunmin kama ani desantaralizason be kolosi cogo min Mali kono (kominiw,

serekiliw, marayorow ani Bamako faaba, okunnafonijelenwdira musow ma).

Komini kelenka ka musojekuluba (koridinason) mogo 6 be erezo kono. Olu n'u ka meriw bolo donna jogon bolo, min b'a to kunnafondise kana musow soro tuguni usigidawla. Meriw yelaiduta, ko komini yiriwali siratige la, olu bena u sekó ke, min b'a to jenogonyasira in be don ba la kosebe cogo min na. U bena erezo wele u ka lajew la. Erezu be o kunnafoniw lase koridinason ma. Koridinason fana be duguw musotonba ladonniya. Erezu min sigira komini 5 ninnu togo la, o nemogobaye konseyeyeye Bagindakan meri la. A y'o joyoro in soro kalata temenen in na, min kera san 2016 nowanburukalo tile 20. Ale y'a jira ko kalan fen o fen b'a to erezo ka se k'a joyoro fa desantaralizasonko senkoromadonni na u ka kominiw kono, o ka jesin musow ma. A ko balikukalan b'la; sabula ko sebenni ye kunnafoni lamaralan ye. Nafasorobaaraw fana b'la, min b'a to musow ka senyerekoro ka se ka sabati a jema nafoloko la.

Dokala Yusufu Jara

Situlu ye soro daba ye musow bolo



Situloko kera sababu ye ka yelema numan don musow dabolo la

Anka jamana fancamanfe, musow kelen don koperatifuw-ye situlu boli kama. O be ka here min lase u ma, o te se ka fo ka ban. Muso ka senyerekoro, o ye haminankoba ye an ka jamana nemogow bolo. O de koson minisiriso min jesinnen be muso ni den ani denbaya ka jetaa sabatili ma, don si da kelen na o'ma bolo jigin musow demeni na. Walasa k'o senyerekoro in lapiniw sabati, waleya caman bolodara ka jesin wulakonomusow ma. O ko kura do ye poroze do sigili ye senkan, min be wele «si poroze». O daminewaati san 2016. Beeb'a don, koanka jamana in kono, n'i ko situlu, bobaaw were t'o la folo musow ka, kerenkerennenya la wulakonomusow. Wulakonomusow kemesarada la, 85 be situlubo ke. O be se muso miliyon 3 jate ma Mali kono. A ma ne min ka situlubo kera baara bolodalenye san 2017 inna. O bee kun ye wulakonomusow ka senyerekoro sabatili ye. Musow be

kalan situlu numan soro cogeo la, k'u kalan a lamaracogo la ani a sannifeere kecogo la, min b'a to u ka nafa soro situlu la. U mana sikolo bayelema ka ke fen suguya caman ye, o b'a nafolosoro teliya suguw la,

ka belebele fara u ka soro kan ani k'u ka koperatifuw lataa ne.

Situloko kera sababu ye ka yelema numandonmusowdabolola. Walasa ka caman fara a nafa kan, baara do bolodalen be ka jesin muso 50.000

jogonna ma dugu 400 kono Kayi, Kulukor, Segu, ani Moti maraw kono fo ka se san 2021 ma.

Anbedon minna, «situlubomansin neci caman» 1.170 sigira duguw la. Mugan ni ko b'olu la, minnu be ji saniman sama ka lamara. Kerne ni ko fana b'ula, minnu be kurandimoguw ma. Walasa k'o waleyaw don ba la kosebe, goferenaman ye baara do boloda ka jesin pilatiformuko jetaa ma jamana kono, k'o baara don muso ni den ani denbaya ka jetaa sabatili minisiriso bolo. Obaara bolodalen in bena waleya san 5 kuntaala kono jamana fan bee fe. A musaka mumé be se sefawari miliyari 55 ani miliyon 400 ma. Dije tonba bolofara min jesinnen be yiriwaliko ma n'ye Pinidi (PNUD) ye, o bena deme don a kola. A dabokunba ye ka baarakeminan kura nafamaw lase musow ma wula kono k'u ka bololabaara nogoya.

**Mariamu A. Tarawele/J Kalo
Dokala Yusufu Jara**

Kalankene : Sanganiwale

Bamanankanna, walekerenkerennen do be yen, o be wele sanganiwale. Gafe kelen min kumana a kan, o ye «Bamanankan maben ye ka nesin karamogow ma».

Misaliw :

1 - Musa Koreké y'a den bugo i ko fali.
2 - Musa koreké y'a den bugo i n'a fo fali.

3 - Musa Kóreké y'a den falibugu.
Sanganiwale be kumasen sabanan de kono, n'o ye «falibugo» ye.

4 - Seku ye te wuli i ko suraka.

5 - Seku ye te wuli i n'a fo suraka.

6 - Seku ye te surakawuli.

Sanganiwale be kumasen woororan na, n'o ye «surakawuli» ye.

7 - U y'an file i ko mogolankolon.

8 - U y'an file i n'a fo mogolankolon

9 - U y'an mogolankolofile.

Sanganiwale be kumasen kónontonnán kono, n'o ye «mogolankolofile» ye.

Misali damado ninnu b'a jira an na ,sanganiwale ye wale suguya minye. Wale don min be sangali ke :

«falibugo» b'a jira an na ko bugoli in kera i n'a fo fali be bugo cogo min. «surakawuli» b'a jira ko te in wulila i n'a fo surakaw be te wuli cogo min «mogolankolofile» b'a jira ko mogolankolon be file cogo min, fileli in kera o cogo in de la.

Kolosiliw : Sanganiwale ka ca bamanankan na, i be se k'a dilan tuma bee n'i b'a fe ka sangali suguya in ke.

An k'a kolosi fana, ko sanganiwale dorogolen don, a tigew walima a dajew be seben ka noro.

Mahamadu Konta

Balokonuman : Jiriforo jiridenw

Jiriforo jiridenw suguya jate ka ca : namasa, mangoro, buyaki, lemuruba, manje, lemurukumunin, manderenin, panpilemusi, nsere, melon. A ka ni waati bee an ka ninnu dun.

Ni sugulataw da ka gelén, an be se k'a jirifu filo saba nogonna turu an ka dukene na, denbaya baloko juman kama ani ka denmisew lajya. O cogo la, an be tige a kan ko nogo bagama ma fiye u la.

An k'an janto, nin jiriden nogonnaw be bo Maroku jamana ni Afirikidisi jamana kan, ka na sugu tige an bolo an ka sigidaw la. O jiriden ninnu be sene sene cogo cejuguw la. A baarakelaw te sara bère soro wa nogo bagama suguya bee be ke k'u fiye waati bee.

Berisoni Tarawele
ka sigidalafén duntaw

Dukene :

Lawale geresijamana (6) : Olénpiki farikolojenajew

A'lini ka dijé don k'a lakali i ka kóle ye. Bi ma kow bila senna. Farikolojenajeba min be ke dijé kono san naani o san naani, o buruju bora lawale Geresijamana kono kabini san keme seegin, sanni Nabila Isa ka bange.

Gerekw fana tun ye Macamantigw ye. U ka Ma do tun be yen ko Zesi, o tun batolendon kosebe. Obatokeyoro tun be dugu min na, o tun be wele Olénpí. San naani o san naani, farikolojenekelaw tun be bo Geresijamana fan tan ni naani kono ka na Olénpí, ka bonyamasegin ke ka nesin Zesi ma. Cew dörön de tun be na nogondanba in na.

Ben kera a kan ko jenajeba in daminená san 776 ka kon Nabila Isa bangeli ye. Farikolojenaje minnu tun be ke, olu tun ye boli, siñeta, bolokurulakele, wotoroboli, tamanfili, zawelofili anidisikifili, negegrinkorota, adw.

Sariya döw tun b'a la : maramafen suguya si tun man kan ka don kene an'alamini kono. Farikolojenajekelaw

yere dama tun te kele jenajeb in senfe. N'i nominena o la, i be nangi ka tila k'i sen bo tulon na. Mogó o mogó tun mana kele tige farikolojenajekela do la, walima k'a kele, Olénpiki jenajew waati la, o tun be sebekoro nangi.

Sebaaw tun jatelen be i'n'a fo Ala ka mogó sugandilenw, u tun bonyalalen donk'ukarama Olénpí Alabatoyorola an'u faso la. U ka jansaw tun ye sumanw, tuluw, jirimaaninw, bogodagaw, adw. Loriyebulu defelen tun be siri sebaa kelen-kelen kun na, k'o ke u ka sebaayajala ye.

Sisan, Olénpiki farikolojenaje kera foroba ye dijé kono. O sababu bora Faransi jamanaden do la, min togo tun ye Piyeride kuberiten. Ale y'a lajenamaya san 1894. Kabini o don, kójenabotónba do sigira senkan, min b'a laben, wa dijé jamana bee be ye a kene kan. Taali a kene kan, o kun te medayisoro dama ye. A kun jonjon ye ka ye kene kan walasa ka bonyamasegin ke ka nesin Gerekw Ma an'u benbow ma.

Mahamadu Konta

Maakorobaro : Meterekene kunnasigiw



Karamogo Daramani Tarawele

Sijedama te maakorobaya ye, fo a ka soro i ye ko caman ke, ka ko caman ye, ka ko caman meen. O la, i ka dnñiwa, kodonani kokorodon, olunafa be se i ka maramogow ma. Maakoro kelen ka meterekene n'e kole ye, a ma dan o ma, a ye meterekene kunnasigiw fana dajira u la.

Meterekene kunnasigiw ye jumenw ye?

Meterekene kunnasigiw ye saba ye : bimeterekene (bimk), döw ko dekameterekare (dam2);

Kemmeterekene (kemk), döw ko Ekitometerekare (hm2);
Bameterekene (bamk), döw ko kilometerekare (Km2).

Furanç jumen be meterekene n'a kunnasigiw ce?

Bimetere 1 = meterekene 100

Kemmetere 1 = meterekene 10.000

Bametere 1 = meterekene 1.000.000

An ka katimu ci ka kene sumanikelan jonjon n'a kunnasigiw seben, k'u n'e an i k'u kalan.

Mun be faamu yan?

So kelen, jatedenfila. Sosigñogonma fila la, numanfeso ka bon ni kininfeta ye siñe 100; kininfeso ka dogo ni numanfeta ye siñe 100.

I yere sifile ninnu na :

1. bimk 2 = mk

bimk 8 = mk

bimk 36 = mk

bimk 260 = mk

bimk 7050 = mk

bimk 900 = mk

2. I yere sifile ninnu na :

kem 5 = mk.....;

kemk 9 = mk

kemk 5371 = bimk.....;

bamk 7 = mk


bamk 306 = mk

Karamogo Daramani Tarawele

Sumanikelanw,

kalan Diya 1998 san utikalo

Agati Firiyandi ka bon kojugu



Agati Firiyendi ye muso ye, min be bo Lawon, Ayisini komini na Faransi. A si hake be san 33 la. A ta ye bonya dantemé ye. A girinya be kilo 350 la. A yere y'a jira k'a le furadama a ka bon. K'a le san 12 y'a soro a girinya ye kilo 120 ye. A ko n'ale tun kasira, k'a mansaw tun be biberon don a da, k'a lanaani n'o ye.

Agati Firiyendi mansaw banna a la kabin o waati la a san 12. A momuso de y'a wasadon a la, k'a b'a lini k'a ka dumuniko bère ben. O fana desera. Ci fosi tun te Agati la dumuni ko. San 2008 kónona na a momuso n'a moke fila bee fatura. Ladonbaako y'a soro kokura.

Tuma min na Agati girinya bora kilo 250 la ka se 350 ma, a yere y'a naniya ka fasa. A ye fasalifuraw ta an i ka dumunibake dogoya. O si ma mako je.

A k'a ye nugusiriw bee ke o si ma je a bolo. A y'o dabila. A sorola k'a wakillu ke Ala ye. A ye kénéma boli dabila; sabula mogow tun be ye a la. Hali k'a yere ko, o fana tun ye baara ye; sabula sigili ni wulili bee tun geleyara a bolo. A furuce Miseli y'a seko k'a demení na ka desé, ko mogó te a ladonni timinandiya je.

A' ye Kibaru san k'a kalan

Minisiriw bennna a kan yelema ka don san 1992 sariyasunba la

Kuluba jamanakuntigiso la, minisiriw ye laje balalen ke jumadon marisikalo tile 10 san 2017. A nemogoya tun be jamanakuntigi Ibrahimi Bubakari Keyita bolo. La je in bolilla fen min kancerenkerennenya la, o tun ye yelema donni ye jamana sariyasunba la, o min waleyali yamaruya dira san 1992 feburuyekalo tile 25. Minisirinemogo de ye o sariya kura in dajira; u benna yelema donni na a la.

Mali kelen ka san 25 soro, demokarasifanga kono, geleya daw kolosira ka den sariyasunba kono daw la.

O de koson demokarasifanga jamanakuntigifo Alifa Umaru Konare tun y'a jini a ka fanga siye filanan kono, k'a be yelema don sariyasunba la; nka a ma se ka ne o ka waati to kono.

Demokarasifanga jamanakuntigi filanan Amadu Tumani Ture fana tun y'o naniya kelen siri a ka fanga siye filanan kono. Nka nagami min donna jamana kono san 2012 waati la, o kera sababu ye n'ale naniya in fana ma se ka waleya.

A kolosira ko geleya minnu be demokarasifanga sabatili la a ne ma jamana kono ka den sariyasunba la, jamanakuntigi Ibrahimi Bubakari Keyita ye jekulu kerenerennen da sigisenkansan 2016 awirilikalola k'o geleyaw latilen. O seben de dajirala

Sariya kura in b'a farafasiya, ko jamanakuntigi de be jamana taabolo politiki dantige ani ka minisirinemogo ta walima k'a bila kasoro hali n'a ma walanseme a yere ma

minisiriw la, u sonna a waleyali ma. Yelema minnu kofolen don, u be tali ke kurukanfuga sariya la. Son kera o minna Manden konokabinis 1236 waati la. Benkan minnu fana tara Alize, Alizeri faaba sigikafoba senfe ben ani lafiya donni na Mali kono, olu donni sariyasunba kono o b'a la, ka fara geleyaw furakecogo kan. N'o ye geleyaw ye, minnu kolosira san 1992 feburuyekalo sariyasunka kono. Sinsin kelen don fen min kan kosebe sariyasunba naniya sirilen in na, o yo demokarasi sinsinbolow ye. Olu de kera san 1991 marisikalo tile 26 wulikajoba kun ye; jamana kelenya sinsin; jamana ka yere mafa sabatili; jamana keli jamanaden beey ta ye ani ka jamanaden beey to a yere sago la



diineko la.

Sariya kura in be jamana ka yere mafa fo k'a bogolodon, jamanakelenya sabatili, hadamadenwa ka hakewlabatoli, Afiriki kelenya sabatili ani dijema jera ka lajeba fila min ke Parini Marakesi, n'u tabukandanwe surunwy «COP21» ani «COP22», olu hakililaw donni ba la.

Mali kono, fangabulon ye seegin ye:

- Jamanakuntigya - Goferenaman
- Depitebulon - Sena - Sariyasunba lafasakiiribulon - Jamanakuntigosa - Faso nafoloko kiiritigesoba - Nafoloko, hadamadenya, seko ni dinko ani sigida n'a lamini kolonabojekulu.

Fen min ye jamanakuntigi ni

minisiriw kirisoba ye, o te jate jamana faganbulonw fe bilen. Nka a b'a ka baara ke a nema. Ni depitebulon y'a sementiya ko jamanakuntigi walima minisiri min ye jamana janfa, a b'o kiiri.

Sariya kura in b'a farafasiya, ko jamanakuntigi de be jamana taabolo politiki dantige ani ka minisirinemogo ta walima k'a bila kasoro hali n'a ma walanseme a yere ma.

Bulonba be ke bolofara filia ye: Fan kelen be ke Depitebulon, ka fando ke Sena ye. Sariyasunba lafasakiiribulon bena ke jamana fangabulon 5nan ye. A kiiritiglaw tacogo, u ka baara kecogo ani n'u b'na baara damine o kalili, ale de b'na o bee n'ebi. Jamanakuntigi fana b'a kali ale de nekoro n'a b'na baara damine; n'o ye faga talia'fe. Fen min ye faso nafoloko kiiritigeso ye, ni jamanakuntigi b'na faga ta ani n'a b'na faga bila, a b'a bolofen beey dantige o nekoro. A be wariko fana kecogo kolosi depitebulon ni goferenaman bolo, kerenerennenya la jamana ka san baarakenafo bolodali n'a labaaracogo ani jamana politikiw kolosili.

Nafoloko, hadamadenya ani seko ni dinko kolonabojekulu togo b'na yelema ka ke nafoloko, hadamadenya, seko ni dinko ani sigida n'a lamini kolonabojekulu ye.

Dokala Yusufu Jara

Dabali ka tige, ka mogow tanga wuluw ka cinni ma

Sikaso mara kono, wuluw ka mogocin dantemeden don. Wulu ka ca mogow bolo ka da wulu jayoro kan sigidalamogow fe. Senekela daw b'u yere deme ni wuluw ye u ka forow kolosili la baganw kana utiye. Odeye wulu cayakunba ye mogow bolo Kenedugu kono. Nka wulu caman were be yen, olu n'u tigiy te n'ogon kalama bilen. Olu be yaalala duguw nefe. A wulu fato ka ca. U ni mogo mana dorogo n'ogon na u b'o cin. U n'u wulunogon walima bagan were mana dorogo u b'o fana cin.

San 2016 kono, wulu ye mogo hake min cin Sikaso mara kono, jatew y'a jira k'o cayara ba kelen ye. Bugunin sekili dogotorosoba kenyafere kono, wulu ye mogo 98 cin; mogo 8 cinni wulufato olula. Nka a jirala ko fa ma don mogosi la k'a sababu ke wulufato ka cinni ye.

Usuman Mayiga ye Bugunin kenyako tigilamogo do ye ka jesin wulu ka cinni kunkankow ma. Ale ka fo la, san 2016 kono, Bugunin dogotorosoba ye fa kubennipikiri 256 ke wuluwla. Ohake in ka dogo kosebe

wulu hake la Bugunin. Nka pikiri min te dogotoroso bolo walasa k'o topoto, Usmani Mayiga y'a jira ko mogo min mana na ni wulu fatu kelen don k'o cin, o be furake ni bolokoro furaw ye. Fura mana dese, a be ke wajibi ye mogo tow ma, uyere k'u ka furaw san. Sabula pikiri hake min be ke mogo kelen na ni wuluy'i cin, o b'a ta 5 la ka se 6 ma, o b'a tigi tanga fa ma san 3 fo 4 kono.

Walasa ka caman bo fa donni na wuluw la ani ka mogow tanga wuluw fatu ka cinni kololow ma, Bugunin dogotorosoba be kunnafonidiw ni lafaamuyali ke waati ni waati a ka

kenyafere kono na.

Usuman Mayiga ni wulupukirilaw be baara ke n'ogon fe. Tuma daw la ni wulu yere mafa cayara duguw kono, u be posoni bila yorow la ka caman faga ka bu a hake la. O waleya in jesiranje b'a to mogo caman fana k'a ka wulu mine k'a ladon konuman, k'a bu yere mafa la. Posoni te bila yorow la ni kunnafoni ma jenseñ o kama. Akeli yamaruya fana be jini a kebaaw fe.

Walasa ka mogow tanga wuluw ka cinni ma, kenyako ani foroba saniya minisiri Madamu Togo Mari Madeleni y'a jira ko wulutigiy k'u jilaja ka fa

pikiri k'u ka wuluw la. Hali ni fa be wulu kelen na, o kasaarantan te dugumogow kan. Walasa ka fa pikiri deseli kunben, Madamu Togo Mari Madeleni b'a jini dogotorow fe, u ka konka pikiru n'ini seben ladonjooria; o b'a to kura ka se ka soro a tuma na, sanni ka korelenw ban.

Fa bana ye, min be baganw ani mogow mine. A ka ca a la fa fanba be soro wulu ka cinni fe. Fa pikiri keli wulu la, obey fa balik'a mine waati kuntaala jan kono; n'o te fa ye bana ye, min mogofaga ka teli.

Fatimata Nafo
Dokala Yusufu Jara

Maliden 163 seginna so ka bo Libi jamana na

An be don min na, halibi geleya dantembe be Libi jamana kan; fanga min lakodennen don dije tonba fe, o ni mogo murutilenw ni n'ogon ce geleyaw be ka caman fara a dansagonkokew kan. O kololo sebekoro yelenen don dunanw na; fo alamisadon, marisikalo tile 2, san 2017, Maliden 163 wereye Libi jamana bila ka segin so. Ubisimilala Bamako-Senu, Modibo Keyita togola pankurunjiginkene na. Musow ni denmisenni caman b'u la, a daw yere banabaato tun don.

Nin Maliden minnu fana nanen file ka bo Libi, a daw y'a jira k'olu tun be minekojuguya dan beey la. Ko u tun b'u jonyamine; hali n'u banana u te furake. Denmisien caman tun ye Libi lasoro ni Eropu gun donnin naniya ye. Taw koni tun be baara la Libi yen ka to k'u somogow bolomagen Mali kono.

Libi faamaw mana dunan minnu mine, u b'u datugu kasol la. Ut a ye geleya suguya beey ye yen. O de koson, u caman be k'a jini Mali goferenaman fe, a ka feerew tige k'u lasegin faso kono.

Mariamu F. Jabate / Dokala Yusufu Jara

Sinimandilannaw ka dege u ka baaraw kecogo numan na



**Alen Gomisi
n'a ka
«Etalon de
Yenenga»
sanunama**

Sinimanjira n'enajeba min tun be senna Wagadugu Burukina Faso faaba kono, o kuncera arabadon, marisikalo tile folo, san 2017. A tubabukan daje surun ye Fesipako (Fespaco)ye. Sinimanko nedonbaaw y'u sinsin a waleyaw kan, k'a jira ko fiéba be sinimanw labencogo la, k'a sababu ke a ko caman nedonbaliya ye. O de koson, u y'a nini sinimandilannaw ka dege u ka baaraw kecogo numan na, min b'a to Afiriki siniman fana ka se ka jira dije gun werew taw koro.

Sinimanjira in baaraw nemogow tun be Gasiton Kabore bolo. Ale ye Burukina fasodenye, sinimandilanna fana don. Jaw ni mankanw tacogo numan kalansoba min be Burukina n'a tubabukan daje surun ye Isisi

(ISIS) ye, o sigibaa do don senkan. An be don min na, Gasiton Kabore yere y'o kalanyoro in nemogow ye. A ka folo, dabali ka kanka tige ka kaländen jolenw senkoromadon tuma min na n'u tilala u ka kalanw na. U kana to u yere bolo ten, u ka dönniya sorolén waleycogo geleya kono.

Afiriki mogow ka kan k'a don, ko siniman ni jogonlon ye kalanbali ka sebenni an'a kalansira ye bi. N'u m'o soro walima n'i y'o tige u la, 'sini u je labanku bin kalanbaliya dibi fin kono.

Nin sinimanjira in kofe, u bena san tan baara d'z boloda ka nesin sinimanko netaa sabatili ma. Sinimanjira jogondaninna, mogomin ka siniman dilannen mana diya ka teme bee ta kan, o be jansa ni ciwara suguya min ye, o be wele tubabukan

«Etalon de Yenenga». O koro ye Yenega ka sokeba bamanankan na.

Mogo o mogo sen be siniman do dilanni na, olu bee ka kan ka kalan u ka ketaa kecogo numan na. O b'a to siniman numan ka se ka soro, min be diya mogow ye kosebe a konokow kama. N'o te siniman minnu be dilan mogowerew fe dije gun tow kan, n'olu diyara Afiriki mogow ye ka teme an taw kan, mogo si tena taa wari sara k'u file walima k'u san.

Barowker a masalakundamadokan ninan Fesipako senfe; i n'a fo «jogonlon ni sinimanko kalansow be dabolo min kan; Sinimandilannetaa kalanw be cogo min na bi; Sinimandilannajamana nemogow joyoro ye min ye.

Barosigi ninnu kun tun ye ka sira jelen don denmisew koro u k'a don, ko jadilan te manamanabaara ye. N'i y'i sebe don ko nafama fen o fen keli ma, k'a kanu, a ka ca a la, o be yiürü i bolo. Denmisew ka kan k'u hakilijakabo u sigida kow kan, ka ja numan laben olu kan.

Ko kerkenkennen fila kolosira nin sinimanjira n'enaje in na. A folo kera jansaba sorobaa kofoliye. Jalatiglaw y'a jira ko Alen Gomisi n'o ka kan. Jansa «Etalon de Yenenga» sanunama kodon. Alen ye Sengali jamanadéne ye. Nin kera ale siye filanan ye ka jansaba in soro. A kura Suleymani Sise la o ye maliden ye; ale fana ta ye siye fila ye. A filanan



Dawuda Kulubali ani n'a ka jansa

kera Konowari jamanakuntigi Alasani Daramani Watara yeliye kow kunceli kene kan. Burukina Faso jamanakuntigi Mariki Kirisitiyan Kabore tun y'a wele o la, uka na je ka jansaba in di jogon fe. Nin jogonna koba tun ma deli ka ke Fesipako la kabini a ko sigira senkan; nin y'a san 48 ye.

Alasani Daramani Watara y'a ka nisondiira jira kosebe. A ka fo la, nin y'a le siye folo ye ka ye Fesipako kene kan. Burukina jamanakuntigi fana ye foli ni tanuni lase Afiriki sinimandilannaw ma. A labanna k'a jira k'a naniya ye sinimanko ka don ba la kosebe, min b'a to a ka se ka ke Afiriki sinsinberedoyeyirwalisiratigela.

Jansa «Etalon de Yenenga» warjelama dira mogo min ma, o ye Siliwesitri Amusu ye. Ale ye Benen jamanaden ye. A ye joyoro filanan soro. Joyorosabanankera Salidi Kalafu ye; ale ye Maroku jamanaden ye. Ladiyalifen dira mogo fila were ma, u joyoros kama u ka sinimanw kono. N'oye Dawuda Kulubaliani, Fatumata Cøyi Kulubali ye. Olu fila bee ye maliden ye. Banki min be wele «Ekobanki», o tunye jansa minlabila, osorobaa de kera Dawuda Kulubali in ye.

Yusufu Dunbiya

Dokala Yusufu Jara

Korofela nemogow sugandilenw sigili daminen

Sigida lakodonnen nemogow be sigi wote senfe, o y'an ka jamana sariya ye. Nka korofela la, wotew ma se ka ke k'a sababu ke lakana sabatibaliya ye.

Alizeri benkan y'a sementiya ko n'o kera, fura min b'a la, o ye jamana ka nemogow sugandi minnu be mara lataama korofela la.

Nemogow sugandilenw ka kanka sige Gavo, Tumutu, Kidali, Tawudeni ani Menaka.

Kidali nemogow sugandilenw sigira taratadon feburuyekalo tile 28 san 27.

A nemogow kera Hasani Agi Fagaga ye, ale ye sordasi koro ye.

Nemogow minnu dara ale kan, olu ye: Homeni Béliko Mayiga ani Abuda Agi Kazina ye.

Nemogow ninnu sigilen, u ye Mali jorjon siri u c'ela. Nka kenemana na, Azawadi jorjon de tun dulonnen don fan bee.

Alamisadon, mariskalo tile 2, san 2017, Gavo mara kolatigejkulu sigira. Mogo 11 minnu sigira, olu nemogow kera Jibirila Bubeyi Samake ye. O ka dankan folo kera Zeyidi Agi



Hasani Agi Fagaga (numan fe) Kidali nemogow sugandilen

Mohamedie ye. Dankan filanan kera Mohamedie Uliudu Mohamedildirisiye.

O alamisadon kelen in na, marisikalo tile 2, Menaka nemogow sugandilenw fana sigira. Mogo 17 minnu sugandira, olu nemogow kera Abuduli wahabu Agi Ahamadi Mahamadi ye. Dankan folo kera Mariyamu Mayiga ye, ka dankan filanan ke Alimutifili Agi Aramitonye.

Korofela marabolo tow nemogow sugandilenw ma se ka sigi folo k'a sababu ke benbaliyaw ye.

Nemogow sugandilen ninnu sigikun ye ka fanga boli folo sanni wotew ka ke ka nemogow jorjow sigi. Waatalatefanga de b'u bolo. A be ke sababu ye Mali ka fanga ka segin korofela marabolo bee kono.

Mahamadu Konta

**«AMAP» kuntigi
Abudulayi Tarawele**

**Kanw kunnafonisébenw
baarada kuntigi
Janzé Samake**

KIBARU

BP : 24 - Telefoni : 20-21-21-04

Kibaru Buguiyé Bosola
Bamako - Mali

**Sébennijékulu
Mahamadu Konta,
Dokala Yusufu Jara**

**Labugunyoro : AMAPU gafedilan
baarada**

Mali ntolatanko cunna a kun kan

Kasaara min binna Samatasége zinoriw kan ni Zanbi y'u gosi 6 ni 1, o ye mogow kamana gan. Sanni o ka kë, an ka ntolatanton nana fila ; Ereyali ni Sitadi Maliyen, olu binna fadenkene kan tako folo dama na. Sanni o fana ce, Samataségew yere taara u bugubagabugu Kani na Gabon, ka wuli k'u jo fulafaki.

O t'a bee ye, a san fila ni ko ye nin ye, kele ni balawu be Mali ntolatanko Federasan kono : biro fila sigira.

Fokaben suguya bee kera, fan fila ninnu ma se ka ben. Bamako dugulenw n'o ye Daarew, Turew ani Darawew ye, olu ye fokabenw jini; olu desera. Silamedine ni kerecendiine nemogow, olu fana y'u se ke a ko la ka dese. Depitebulon, peresidan, peresidan koro Jonkunda Tarawele, peresidan Iburahimu Bubakari Keyita, olu y'u sen don k'u bolo don, ka dese. A kiira tara ka se dijne ntolatanko tonba ma n'o ye FIFA ye, o y'a malako - malako k'a bila.

A ma ne min ko farikolojenaje minisiri Huseyini Amiyan Guindo ye federasan ci. A ye jekulu kerenkerennen do sigi senkan, o ka Mali ntolatanko jenaboo sanni biro kura ka sigi.

O waleya in ma taa FIFA jimin sira



Sidi Jalo, Mali ntolatanko jenaboo jemogobo

fe. FIFA y'a jira k'a ma dijne n'o ye, k'a jini Mali goferenaman ka segin a ko.

Dijne ntolatanko jenaboli tonba ka jate la, politiki man kan k'a sendon ntolatanko la; o konnen don u ka sariyaw fe.

Mali ko a tena segin a ko ; FIFA y'a nangi k'a senbo dijne ntolatanko bee la, ka nafolow tige a la, ka joyorow tige a la.

An be se ka min koni fo, a yera k'a fo ko jamanaden dow de ye faso janfa, u ye ntolatan janfa, u ye ntolatan kanubagaw janfa; k'a sababu ke

juguya an'uyere kelen pe ka nafa ye. Jamanadenw tenu jine o ko bi, sini ani sinikene; o fasojanfala ninnu, faamawb'ula, Mali federasan mogow b'u la, ntolatanton jemogow b'u la.

Mali ntolatankoko jenaboo jekulum min sigira goferenaman fe Federasan no na, o jemogoba kera Sidi Jalo ye. Sankelendira a ma, geleyaba min be Mali ntolatanko la kabini san 2015, a ka fura soru o la teliya la. A ka kan fana ka yelemba don ntolatanko taabolo yere la. Ntolatanna minnu ka baara ye ntolatan ye, u be sara a la, sanpijona bëna to olude bolo. Minisiri y'a jini a fe fana u ka baara ke federasan koro no na, k'o joyoro fa fo ka se biro kura sigili ma.

Sankelenbaara in kalifara ce ni muso minnu na, olu togo file nin ye :

-Jemogobo: Sidi Jalo, farikolojenaje jenaboli donniyatigi don,

- Muso kelen b'a la, o ye Jenebu Sanogo ye, Mali basiketikela koro don, denmisénw kafoyojo jemogobo fana don. A mogo tow ye :

- Amadu n'a be wele Baba Sise,

- Amadu Jara Yalikuye (o be baara ke farikolojenaje minisiriso la),

- Misa Joma (farikolojenaje

minisiriso nafoloko n'a minenku jemogobo).

- Suleymani Bobo Tunkara, (o ye farikolojenaje kunnafonidilaw jemogobo ye);

- Amara Male Jalo, (o ye kunnafonidila ye ORTM na)

- Abudarahamani Beni Matata Ture (o ye awoka ye);

- Musa Beni Deka Jabate (o ye ntolatankalatigebaga koro ye);

- Modibo Sinbo Keyita (o ye sariyatigi ye)

- Hamidu Halibasa (o ye dogotoro ye)

- Koloneli Sarili Musa Jakite (o ye sorodasiw ka farikolojenaje mogo ye)

- Iburahimu Camu, (o ye Mali ntolatanna koro ye),

- Mohamed Saliba Ture (o be Mali denmisénw ka tonba la)

- Mahamadu Konta, (O ye kalansobaw karamogoye)

- Metiri Magate Asani Seyi (o ye awoka kuntigi koro ye)

- Guro Sidi Jalo, (o ye hadamadenyako donniya karamogoye)

- Musitafa Mayiga (farikolojenaje kunnafonidila don).

Mahamadu Konta

Ahamadu Ahamadu sigira Isa Ayatu no na Afiriki ntolatanko kunna



Yelema donna Afiriki ntolatanko jenaboli jekulu jemogoko la n'o ye KAFU (CAF) ye, alamisadon, marisikalo tile 16, san 2017, wote senfe. Jemogo koro n'o ye Isa Ayatu ye, Kamerunia, obinna. Sebagia kera Ahamadu Ahamadu ye, o be bo Madagasikari jamana kan. Mogo 34 wotera ale ye, Isa Ayatu ye mogo 20 dɔrɔn soro. O gundolawote in jaabiw balala mogow la, bawo Ayatu tun be

jemogoya la kabini san 1988, o ye san 29 ye. A tun sigira jemogoya la wote senfe siye 8. A ye baaraba caman ke Afiriki ntolatanko jetaa sabatili la. Nka a tun ye dantemewale caman fana ke an yeresagoke dow ka da a kan a meennna kojugu jemogoya la.

A binni ma bala ntolatanko faamuyabagaw la.

FIFA peresidan koro min binna n'o ye Bilateriye, a n'o da tun be file kelen na.


U ka fo la, Ayatu boli Afiriki ntolatanko kunna, o benna FIFA jemogobo kura ma, n'o ye Giyano Enfantino ye.

Kafu peresidan kura kera Madagasikari ntolatanko jemogobo ye ka teme, a ye farikolojenaje minisirija fana ke kate me a kajamana kono. Feere caman b'a bolo ka yelemw don Afiriki taabolo la ntolatanko la. Mahamadu Konta

Kirisitiyano Oronalido sara ka ca ni ntolatanna to bee ta ye sisan

Kirisitiyano Oronalido ye Poritigal jamanaden ye. An be don min na, a be ntolatan na Esipani ntolatantan min na, o ye Ereyali Madridi ye. San 2016-2017 ntolatan kanpani kono sefawari 57.321.100.000 tun y'a sara ye. O b'a jira k'a sara ka ca ni ntolatanna to bee sara ye an be don min na. Arizantini jamanaden Leyoneli Mesi ta ye sefawari 50.101.100.000 ye. Berezili jamanaden Neyimari ta ye sefawari 36.352.100.000 ye.

Nin kunnafoniw soro ntolatanko kunnafoniseben min fe, o be wele « Faransi Futuboli ». Ntolatanna ka sara, warri were ninnu be dia ma ntolatan kelen-kelen senfe, an'a bewari minnusoro a togoganseliw senfe, Faransi futuboli de b'a sinsin o mume kan ka ntolatanna ka sora



dantigentolatankanpani kono. Ojatew de fe, a jirala ko Kirisitiyano Oronalido be tenkan soro ko la san 2016-2017 in na. Ninwariko inkunnafonijenseen kofekalosaba ni tila pogon na, mankan wulila Kirisitiyano Oronalido ko, k'a te k'a ka lènpow ni tsaaalenw sara.

SAN 2017 MARISIKALO KIBARU KONKO

- N° 2 : Fasokanw togoladonba seli kera Zancebugu jinan
- N° 3 : Musow ka senyerékoro hadamadenya, nafoloko ani politikiko la
- N° 4 : Fekofé
- N° 5 : Kalankene : Sanganiwale

Dukene : Lawale geresijamana (6) : Olénpiki farikolojenaje

- N° 6 : Minisiriw benna a kan yelema ka don san 1992 sariyasunba la
- N° 7 : Sinimandillannaw ka dege u ka baaraw kecogo luman na Körönfela jemogobo sugandilenw sigili daminen